

Moción para promover unha declaración institucional do Concello de Malpica de Bergantiños, co obxecto de demandar a exención da pesca accidental, dentro da modalidade de pesca artesanal, do sistema de TAC,s e cotas implantado pola UE.

A Confraría de Pescadores de Malpica, presenta ao Pleno do Concello de Malpica de Bergantiños a presente MOCIÓN para o seu debate e aprobación, se procede, de acordo coa seguinte

EXPOSICIÓN DE MOTIVOS

A presente iniciativa ten como principal obxectivo por de relevo a desigualdade de trato e a inxustiza existente no sector pesqueiro por mor do actual sistema de reparto de TACs e cotas (distribución das posibilidades de pesca) para a frota de artes menores.

Ata fai pouco, na Unión Europea (UE) definíase a pesca costeira artesanal como a desenvolvida por buques inferiores a 12 metros de eslora e con determinadas artes de pesca. Toda a pesca executada por buques de eslora maior ou con artes non contempladas como artesanais pola UE, entrarían dentro da denominación de industrial.

Elo implicaba que tódalas embarcacións maiores de 12 metros, quedarían fóra da categoría de pesca costeira artesanal, supoñendo importantes prexuízos para esta frota – ex. non poder acceder ás axudas dos Grupos de Acción Local de Pesca (GALP's) con fondos FEMP –.

A día de hoxe, a UE está a utilizar unha definición multiparamétrica da pesca costeira artesanal, sendo necesario para o recoñecemento desta frota como tal, o cumprimento de alomenos tres, dos cinco criterios seguintes: 1. Eslora das embarcacións inferior a 12 metros. 2. Distancia do caladoiro, faenar dentro de augas nacionais. 3. Duración máxima das mareas: 24 horas. 4. Utilización de artes de pesca sostibles. 5. Máximo de 4 tripulantes enrolados e a bordo.

Ata o ano 2013, a normativa estatal na materia (Orden ARM/271/2010, do 10 de febreiro, modificada pola Orden ARM/3315/2010, do 21 de decembro) establecía uns criterios para o reparto e xestión das cotas de diferentes especies por modalidades de pesca e dentro de cada modalidade por tripulante embarcado a bordo e día.

A partir da dita anualidade e a través da Orden AAA/1307/2013, do 1 de xullo, derrogada pola Orden AAA/2534/2015, estableceronse plans de xestión para a distribución das posibilidades de pesca e un sistema de reparto distinto ao que historicamente se viña aplicando, vencellado directamente cos datos de consumo de capturas históricas (datos obrantes na SEGEPESCA do período 2002-2011), ás que se lle deron prioridade fronte a aspectos socio-económicos das frotas afectadas nas distintas pesqueiras, ou o que é o mesmo, sen terse en conta que Galicia representa o 90% da frota de artes menores do Cantábrico-Noroeste, e a que, en aplicación do criterio por históricos, non acada máis dun 15% de cota nalgúns especies.

En fin, pasouse dunha pesqueira lineal para todos os buques (cada embarcación dentro das súas capacidades de pesca e almacenamento e sen criterios de reparto por comunidade autónoma ou outras divisións territoriais) para se converter nunha fonte de desequilibrio interrexional dentro dun mesmo estado.

Asemade, catro anos despois da entrada en vigor da nova política pesqueira comunitaria (PPC), o sector da pesca artesanal segue sen poder cadrar esixencias, prohibicións e obxectivos. Bruxelas deixouno sen marxe de manobra, combinando cotas escasas e unha impracticable obriga de desembarco para todas as capturas. Dende o 01/01/2019 coa aplicación da política de “descartes cero”, poderá haber embarcacións que teñan que parar, despedir tripulacións ou incluso ser despezadas.

A PPC, non está pensada nin adaptada á realidade da pesca artesanal e na UE só se escouitan e teñen en conta as demandas dos grandes *lobbies* pesqueiros, sen porse en marcha medidas específicas para este segmento da frota. Sen dúbida haberá problemas, e podería chegar un momento no que a pesca artesanal quedase desmantelada.

Trátase pois dunha preocupante situación, de todo dramática para as comunidades pesqueiras de Galicia, altamente dependentes dunha actividade que da emprego directo a máis de 9.000 persoas.

En definitiva está dabondo demostrado que no intre de repartir as posibilidades de pesca, a frota artesanal sempre sae mal parada e discriminada, aínda tratándose da más sostible, sustentable e respectuosa co medio mariño e a que garante menores capturas, mais de maior calidade.

Por todo o anteriormente exposto, a Confraría de Pescadores Malpica solicita ao Pleno da Corporación do Concello de Malpica de Bergantiños adopción dos seguintes

ACORDOS

O Pleno do Concello de Malpica de Bergantiños, mediante escrito asinado por todos/as e cada un dos Membros que integran a Corporación Municipal, SOLICITA aos Grupos Políticos con representación no Parlamento de Galicia e no Congreso dos Deputados, que adopten e executen as seguintes decisións:

- 1. PROMOVER E CONSENSUAR AS MEDIDAS NECESARIAS PARA MATERIALIZAR A EXCLUSIÓN DAS CAPTURAS ACCESORIAS OU ACCIDENTAIS DA FROTA COSTEIRA ARTESANAL DO SISTEMA DE TACs E COTAS, DADA A SÚA MULTIESPECIFICIDADE E, POLO TANTO, O SEU ESCASO IMPACTO NO ESTADO DOS RECURSOS MARIÑOS.**

Dentro da pesca costeira artesanal, compre establecer criterios de diferenciación entre o que significa *a pesca accidental* e a *pesca dirixida*. O tratamento das dúas modalidades debería ser de todo independente: a *accidental* debe estar á marxe dos criterios de TACs e cotas ou de obriga de desembarco, dado que representa as capturas de especies accesorias durante a pesqueira dunha especie obxectivo. Por outra banda, a *dirixida* oriéntase á pesqueira dunha determinada especie, debéndoselle aplicar unha xestión das posibilidades de pesca a través de criterios de reparto que garanten igualdade de condicións entre as unidades de frota participantes

- 2. REQUIRIR UN TRATAMIENTO DISTINTO E DIFERENCIADO DA XESTIÓN DAS POSIBILIDADES DE PESCA DA FROTA ARTESANAL CON RESPECTO ÁS FROTAS INDUSTRIAL E/OU SEMIINDUSTRIAL.**

As embarcacións de pesca costeira artesanal son de pequeno porte, utilizan artes e aparellos de pesca altamente selectivos, desenvolven a súa actividade pesqueira de forma tradicional, sostible, cun baixo volume de capturas de especies moi diversas e de gran calidade.

A pesca costeira artesanal nas súas diferentes modalidades realiza de xeito exclusivo en augas interiores e cunha importante dependencia socioeconómica, tendo en conta a gran cantidade de postos de traballo que xera, tanto directos como indirectos.

Xa que logo, queda suficientemente demostrado que a incidencia da pesca costeira artesanal é socialmente moito más relevante que a industrial ou semi-industrial e, polo tanto, estímase esencial a súa protección e salvagarda, propoñendo a súa regulación a través de criterios específicos e consecuentes, e en ningún caso mesturados con outras pesqueiras de intereses moi distintos.

3. CONTINUAR RECLAMANDO QUE A PESCA COSTEIRA ARTESANAL QUEDE EXENTA DA OBRIGA DE DESEMBARQUE.

É indispensable seguir insistindo ante a Unión Europea, que a normativa que regula a obriga de desembarque de capturas para a frota costeira artesanal, quede sen efecto.

É indubidable que a decisión de “política de descartes cero” tomouse de xeito precipitado no seo da UE, sen facerse os estudos correspondentes e sen ter en conta as pesqueiras multiespecíficas nas que desenvolve a súa actividade a frota costeira artesanal galega.

O feito de aplicar o regulamento tal e como está redactado, podería supoñer que non se poida desenvolver a actividade pesqueira, cando se poden acreditar as boas condicións dos caladoiros galegos, debido a forma de traballo sostible da pesca costeira artesanal.

4. ELIMINACIÓN OU RECONSIDERACIÓN POR PARTE DA UE, DA DEFINICIÓN MULTIPARAMÉTRICA DA PESCA COSTEIRA ARTESANAL.

É preciso procurar a eliminación do punto 1, no cal se define como pesca costeira artesanal aquelas embarcacións menores a 12 metros de eslora e ademais tamén se debe excluír o punto 5, no correspondente a un máximo de 4 tripulantes enrolados e a bordo.

En Malpica de Bergantiños, a 31 de Xaneiro de 2019